



Lu Vèsperu sicilianu, particulari, nta na stampa
(Franciscu Hayezby 1846)

MOVIMENTO PER L'INDIPENDENZA DELLA SICILIA

fondato nel 1943

Storia dû Vèsperu (parti prima)

**«Palermu hà firmatu tutti cosi
Pri dàricci l'assartu a li Farnzisi.
E lu Franzisi cu la sò putenza
'N Sicilia facia malacrianza:
Lu pani nni livava di la menza,
Franzisi si vidianu a ogni stanza;
Iddi fidannu nni la sò putenza
E nui, mischini, sutta la sò lanza;
Nta n'ura fu distrutta dda simenza,
fu pri tunnina salata la Franza»**

La rivuluzioni

Semu ntâ Pasqua dû 1282. 'N Palermu lu pòpulu avia statu a li funzioni riliggiosi dâ simana Santa. Cui avia dèbbiti cû fiscu e cui era cumprumessu cû cuvernu, avia nisciutu di unni s'avìa ammucciatu e, ammiscatu ammenzu â fudda, avia trasutu intra li crèsii, pinzannu ca ntâ casa dû Signuri avissi attruvatu nu sicuru asilu, ca lu tirannu avissi arispittatu. Accuddi non fu: li birri angìuini li jèvanu attruvannu intra a li crèsii e li purtavanu fora malamenti e appoi, ncatinati, pigghiati a corpa, nzurtati, li purtavanu carzarati pi èssiri turturati. Mai ntâ so' storia lu pòpulu palirmitanu avia avuto tanta pacènzia. Carlu avia livatu a li citatini la pussibilitati di purtari la spata e, sapennu quantu la so' razza era udiata, suspittava ca, mmeci di spati, chissi avissiru 'n coddu, ammucciatu, li cuteddi; pri chissu l'angìuini, ammiscati mmenzu â fudda, ièvanu nti chistu e chiddu, e macari ntê fimmini, scaminannu ntê robbi e ntô pettu.

Lu lunidia doppu Pasqua cc'era pò pòpulu l'usanza di iri ô vèsperu ntâ crèsia di Santu Spìritu, fora li mura dâ cità, pirchè la liggenna riliggiosa voli ca quannu vinni fabbricatu lu santuariu ci foru ddocu miràculi straordinari. Nnâ campagna dû circunnariu dû santuariu, ntra l'erva, cumitivi mpruvvisàvanu fistini e, ntâ l'òria dâ primavera ca vinìa, si ntricciàvanu rilazzioni amurusi e trattativi di matrimoniu.

Vinniru surdati e birri franzisi a rumpiri la tranquillitati di dda festa, e cu atti spavardi, affinnèvanu li virtù e la risirvatizza dî fimmini maritati e schetti; e senza nuddu cuntegnu si misiru a scaminari 'n coddu a òmini e fimmini, suspittannu ca muggheri e figghi tinissiru cuteddi pè mariti e patri.

Na gentilissima donna, di beddu e nòbbili aspettu, si nni ieva passijannu ntâ campagna ô ciancu dû so' spusu; la vitti nu surdatu ca ci misi li manu ntô pettu e ntra la vistina; chista, pi tantu urraggiu, sviniu, mentri ca lu maritu la tinìa ntra li vrazza; dâ fudda nesci nu scanusciutu ca ci duna na cutiddata murtali a lu surdatu e dici forti cu raggia: "Mora, mora!"

"Mora, mora!" arrispunni n'òtru, e appoi n'òtru ancora e tanti e tanti, nzinu ca addivètanu milli li vuci ca nèsciunu dî petti; pugnali, cuteddi, vastuna, petri e tutti l'armi ca si ponnu attruvari;

sònanu tutti nzemi li campani dâ crèsia. "Mora, a morti li Franzisi!" e ntâ chiazza mancu nu franzisi aresta vivu. Sti vuci, st'accisioni si spànnunu prestu ntâ campagna cchiù vicina e appoi arrassu e appoi ntâ cità; tutti li campani sònanu e non si senti àutru ca na vuci sula "Mora, mora! Morti a li Franzisi".

Li franzisi mòrunu ntê strati, ntê casi, supra li tetti, unni su' ammucciati, ntê cummenti, ntê crèsi: cui pò, ammazza nu franzisi. Nenti li po' sarvari. La ràggia dû pòpulu non talia nenti e nuddu: non talia siddu è màsculu o siddu è fimmina, siddu è granni o picciriddu, non talia siddu è curpèvuli o nnuccenti; abbasta ca sunnu francisi, ca tartàggianu dda lingua: ognidunu di li scanusciuti ca s'ancontra pri la strata, havi a diri la palora "cìciri" e cui la prununza "sìsiri" veni ammazzatu senza nudda pietati. "Morti a li tartagghiuni!".

La straggi cuntinua tutta la notti e lu jornu doppu ntâ cità, ntê terri vicini, ntê cuntrati cchiù ammucciati, nzinu a spannirisi pri tutta la "vaddi di Mazzara". Nta stu primu summuvimentu pupulari, vènnunu fatti a pizzudda chiossai di 2.000 franzisi; li corpi massacrati lassati ntê strati pri jorna e jorna e appoi vurricati no pri pietati, ma pô fetu ca mpista l'ària.

Cunigghiuni è la prima a iri appressu e fari comu a li palirimitani, e appoi l'àutri terri cchiù pupulati, e appoi la rivuluzzioni si spanni pri tutta la Sicilia.

Cunigghiuni, Murriali, Carini, Termini e àutri terri ntô stissu jornu di Palermu imitaru a chista ntâ l'ammazzatina dî franzisi, e doppu ca èranu morti l'appinneru nta l'àrvuli pri èssiri taliati di tutti. Lu jornu appressu fici lu stissu Cefalù, Pulizzi e àutri cità dû cuntornu.

A Trapani Riccardu Abbati fu lu primu ca spinciù lu pòpulu â vinnitta pi na nova tassa ca vulia mètteri lu Cuvirnaturi franzisi Nugarettu; ntô stissu jornu a Marsala Birardu di Ferru, chî so' parenti, nisciù a manu armata ntâ chiazza e assartau lu Cuvirnaturi Burdaccu mentri ca chistu facià mètteri nu bannu ca tutti li citatini purtàssiru a l' Eràriu rìggiu l'oru e l'argentu: dû Cuvirnaturi e di li soi birri vinni fatta na carnificina. Mazzara e li terri a idda vicini, ficiru lu stissu.

Ntô terzu jornu s'arribiddau Girgenti pri causanza di la viulenza fatta dî franzisi a l'unuri di na figghia di Simuni Musca, nòbbili e putenti citatinu. Macari Licata s'arribiddau, pirchè li franzisi avianu livatu la robba a Arbertu Galati e, quannu chistu addumannau justizzia, l'ammazzaru. A Naru ô quartu jornu foru ammazzati 6.000 franzisi pri vinnicàrisi di l'anghirì patuti.

Ntô stissu jornu a Castrugiuvanni succidia ca, avennu lu Cuvirnaturi Luiggi Mompilier chiamatu comu tistimoni la muggheri di Giovanni di Turrella, na vota avuta ntra li manu si la tinni la notti; quannu lu maritu di chista chî so' figghi jenu a ricramàrila cci fu nijata e annunca Giovanni Turrella nun ci vitti cchiù di l'occhi e cu tri cutiddati firiu a morti lu Cuvirnaturi. Chistu fu lu signali dâ rivuluzzioni.

"Mòrinu, mòrinu li Dracuni!" e foru ammazzati tutti li franzisi, e lu Cuvirnaturi, ca nun avia ancora murutu, vinni appinnutu pô coddu nti na finestra dû so' palazzu.

A Chiazza, Perottu di Cartaggiruni nisciù cu 200 òmini armati e ivu a la casa dû Cuvirnaturi, ca, ntantu, si nn'avìa fujutu; ncuntràtulu ca fujeva ancora, l'ammazzò câ spata.

A Cartaggiruni vinni fatta minnitta di 225 franzisi ca, doppu aammazzati, foru appinnuti tutti nti na longa travi.

A Minìu dî franzisi nun arristau mancu la simenza, avènnusi lu pòpulu minnicatu dû Rittori franzisi Ludulfu, ca ogni simana si facià purtari na vèrgini pri passari tempu.

A Lintini, cinqu jorna doppu dâ rivuluzzioni di Palermu, Giovanni di Lamìa, nubbilissimu cavaleri, avennu la passata simana fattu uppusizioni a l'òrdini dû Cuvirnaturi Papiriu Comitini di pigghiari di l'Eràriu dâ Cumnunitati quattrumila ducati, vinìa fattu priggiuneru; mentri ca passava ntra la fudda, chistu rimpruvirava lu pòpulu ca lassava accuddi trattari malamenti cui l'addifinneva, Lu pòpulu, cummosu, pigghiau a pitrati lu Cuvirnaturi, appoi pigghiau l'armi e non foru massacrati sulu li franzisi c'attruvaru ntâ cità, ma macari chiddi ca scapparu, pri sarvàrisi, a Pantalica e Sciurtinu.

A Sarausa, lu Cuvirnaturi Cliomini de Remis fici mintiri li manu 'n coddu a la muggheri di Perrellu di Modica, granni cavaleri, câ scaciuni di taliari siddu avissi ammucciati armi e oru, ca avianu stati pruibbiti; quannu lu sappi lu maritu, curriù ntâ chiazza cu centu òmini armati e, abbanniannu "Ammazza, ammazza", fici a pizzudda Cliomini e tutti l'àutri franzisi. La straggi cuntinuau a Morica, a Scichili e a Sciurtinu.

A Catania di quanti franzisi c'èranu 'n cità, non si nni sarvaru ca dui: lu Cuvirnaturi Michiletu Gatta e lu so' servu, ca fujeru apprima a Taurmina e di ddocu a Missina.

Nzumma, non èppiru nuddu postu unni putìrisi arifuggiari; sulu nta quarchi casteddu ca s'addifinneva bonu, unu dî quali fu chiddu di Spirlinga ca potti scurpiri appoi 'n capu a la sò porta lu muttu: "Quod Siculis placuit sola Spirlinga negavit" (Zoccu cci piacìa a li Siciliani, sulu Spirlinga lu nijàu).

A Palermu, la stissa sira dû 30 Marzu, finuta ca s'avìa fattu minnitta di tanti urtraggi, a capu dû pòpulu vinni misu Ruggieru Mastràncilu, cavaleri e citatinu arispittatu pri la granni riputazzini c'avìa, valurusu nti l'armi e saggiu assai ntô cunsigghiaru. Ô sonu dî trummi e dî tammuri, vinni graputu l'anticu cunfaloni palirmitanu, cu l'aquila d'oru 'n campu russia, e pri sùbbitu vinni dicritata la cascata di la dinastia Angiuna e ristaurata la Ripùbblica dû 1254.

Li primi magistrati pri la nova Ripùbblica foru: Ruggieru Mastràncilu, Enricu Barresi e Niculosu di Ortilevu, cò titulu di cavaleri; Nicculò Ebdemona fu capitanu dû pòpulu; Giacumu Simonidi fu baiulu; Tummasu Grillu, Simuni Farrasiu e Bonamicu Garzetta foru fatti jùdici; Bartulottu di Militi, Pierottu di Cartaggiruni, Luca Guidaifu, Riccardu Fimetta comu cunsiggheri.

Doppu Palermu, macari Cunigghiuni ristaurò la Ripùbblica dû 1254 e, forsi, macari iddu câ stissa furma dû cumuni di Palermu.

Ntra chisti dui cumuni fu fatta la prima "Lega di li Cumuni siciliani": iddi facianu sulenni prumissa d'aiutu di l'una e di l'àutra banna d'addifènniri la libbirtati cu l'armi e chî dinari; si prumittianu franchiggi e nenti dazzî e gabbeddi ê citatini di l'unu ntô tirritòriu di l'àutru; pri finiri, Palermu prumittìa di dàricci n'aiutu a Cunigghiuni pri sdirrubbari lu casteddu di Calatamauru, ca era troppu forti.

N'àutru tantu ficiru àutri cumuni di la vaddi di Mazzara; e mannaru a Palermu s'innichi e diputati pri mèttiri a dispusizzioni sordi e difinsuri; unni, aricugghiuti a ginirali Parramentu e abbanniannu forti, s'addichiaràvanu di vuliri apprima mòriri, e no di turnari ô sirvizzu di li franzisi!

Ruggieru Mastràncilu, allura, si misi unni tutti lu putianu vidiri e parrau cu vuci forti: «*Haiu sintutu palori forti e tirribbili sacramenti, o citatini, ma nuddu penza ô doppu; comu siddu stu sangu ca si ittò, vulissi diri ca la vittòria è cosa fatta e no pruvucazzioni e lotta longa, murtali! [...] Ddà, 'n cuntinenti, a li franzisi cci abbrùcia e vòlunu minnicàrisi; intra a na para di jorna l'avemu n'àutra vota ccà! [...] Citatini, capitani dî pòpuli, iu penzu ca s'hannu a mannari missaggi a tutti l'àutri terri pri juncìrisi cu nuàutri; cu l'armi, cu la vilucitati, s'hà dari aiutu a li dèbbuli, s'hà cummenciri a cui havi dubbî, s'hannu a cummattiri l'arruganti [...] Spartèmini nta tri squatri e curremu pri l'isula tutta. S'hà fari nu Parramentu ginirali ca discurre li cunsigghi, ca junci li voluntati e fà li dicreti pri l'òrdini pùbblicu; Palermu non havi sònnira di duminiu, ma vò circannu la libbirtà pri tutti; e pri Palermu sulu l'unuri d'èssiri stata la prima a lu ribbillamentu!*»

«*Amuinni, curremu!*» cci arrispunniù lu pòpulu cu na vuci sula: e prestu prestu s'aricuggheru l'armati, si pigghiaru li cavaddi e sùbbitu nisceru dî porti di Palermu tri squatri. Na squatra ivu pri Cifalù; n'àutra pri Calatafimi; la terza curriù pò d'intra di l'isula, ammeri Castrugiuovanni; e tutti tri li squatri spanneru 'n tutti li paisi la rivuluzzioni, e a tutti li banni chista triumfau quasi senza nudda risistenza.

Santu Truvato

Movimento per l'Indipendenza della Sicilia

Presidenza Nazionale - Santa Venerina

Via Giovanni Mangano, 17 – Santa Venerina (CT)

Tel. (+39) 095 953464

Mobile (+39) 339 2236028

Uff.cio Segreteria Nazionale Belpasso

Via Lorenzo Bufali, 2 - Belpasso (CT)

Mobile (+39) 368 7817769

Vice Segreteria Nazionale – Porta Voce Uff.le

Via Falsaperla, 6 - Catania

Mobile (+39) 347 3149603

internet: www.mis1943.eu

email: mis1943.presidente@gmail.com

***«La Sicilia di domani sarà quale noi la vogliamo: pacifica, ricca, felice,
senza tiranni e senza sfruttatori»***

Antonio Canepa, “La Sicilia ai Siciliani” 1942



© Movimento per l'Indipendenza della Sicilia - All rights reserved

QUESTO TESTO PUÒ ESSERE LIBERAMENTE E GRATUITAMENTE INOLTROTO, NELLA SUA INTERESSA ED ATTRIBUENDONE L'ORIGINE,
A CHIUNQUE POSSA ESSERE INTERESSATO AI CONTENUTI ESPRESSI E ALLE INIZIATIVE DEL M.I.S.